

կողմից, ստացած հիւանդութիւնը միւս կողմից, նրան ձգեցին մի տեսակ սրտատոչոր մելամաղձութեան մէջ: Նա սկսեց ինքնամոռացութեան մէջ հանգստութիւն որոնել եւ յանձն առեց մի այդպիսի դժոարին աշխատութիւն, որպիսին է եկեղեցական պատմութիւնը, որ աւելի մտածութիւն է պահանջում, քան թէ երեւակայութեան բանաստեղծական թռիչքը: Նրա վանք մտնելը եւ հոգեւոր կոչման ցանկութիւնն անգամ մի տեսակ քմահաճութիւն է, ինչպէս եկեղեցական պատմութիւն գրելը, որ հետեւանք է Նոյն մելամաղձական դրութեան: Նա կամենում է մոռանալ իրան եւ նետւում է ամենադժոարին աշխատութիւնների մէջ, որ ամբողջովին կլանեն նրա մտածութիւնները: Բանտի մէջ սկսեց եբրայեցերէն սովորել՝ Հին Կտակարանի հետ լաւ ծանօթանալու համար: Նա իսկապէս շատ դժբախտ մարդ է... Նրա մուգան երբեք կեանքի քաղցրութիւն չէ ճաշակել... Տխուր եւ դա՛ռն կերպով անցել են նրա օրերը...

Համարեայ ամբողջ գիշերը անցուցինք մենք խօսելով. իմ քունը չէր տանում: Ասլանը Նոյնպէս գտնւում էր մի տեսակ գրգռած դրութեան մէջ, որ յատուկ է այն րոպէներին, երբ մարդ պէտք է բաժանտէ իր սիրեցեալներից եւ բաժանտէ երկար, շատ երկար ժամանակով...

Առաւօտեան պէտք է նա ճանապարհ ընկներ: Վանքի դռան մօտ սպասում էր նրա ձին: Համրը դուրս չեկաւ իր խուցից: Ասլանը ինքը գնաց նրան մնաք բարեաւ ասելու: Յետոյ մենք միասին ոտով գնացինք մինչեւ Խորենացու գերեզմանը: Այստեղ կանգնեցրեց ինձ նա, այստեղ գրկոցեցաւ, համբուրոցեցաւ ինձ հետ, եւ այստեղից, իր ձին նստելով, ճանապարհ ընկաւ: Ես երկար նայում էի նրա ետեւից, բայց ոչինչ չէի տեսնում: Հեղեղի նման հոսող արտասուքը նսեմացրել էր իմ տեսութիւնը...

Նա գնա՛ց, ուր պարտքը եւ եռանդը մղում էին նրան... Նա գնաց, բայց նրա թանկագին յիշատակը միշտ անմոռաց մնաց իմ սրտում... Որքան աճեցին իմ տարիները, որքան աճեց իմ զարգացումը, այնքան աւելի աճեց եւ մեծացաւ իմ աչքում յարգելի մարդը, որ այնպէս ջերմ, անձնագոհ կերպով նոհրոած էր իր հայրենիքի բարօրութեան գործին...

## ԼԳ. ԱՄՐՈՅԻ ԱՂՋԻԿԸ

Անցան տարիներ՝: Քանի՞ տարիներ, լաւ չեմ յիշում...

Տխուր ու ծա՛նր էին ժամանակները: Կարծես, մի բան բոլոր սրտերի վրայ ճնշում էր, բոլորին շոարեցնում էր: Մարդիկ դժգոհ էին, բայց չգիտէին թէ ի՞նչ բանից են դժգոհ: Տիրում էր ընդհանուր վիատութիւն, ընդհանուր